

Rundingan Meja Bulat Anjuran Pemuda Umno Cuba Rungkai Isu PTPTN
Bername
10 April , 2012

KUALA LUMPUR, 10 April (Bernama) -- Pergerakan Pemuda Umno Selasa memulakan Rundingan Meja Bulat Mahasiswa untuk meleraikan kekeliruan yang timbul berkaitan isu Perbadanan Tabung Pendidikan Tinggi Nasional (PTPTN).

Rundingan yang disertai lebih 200 badan bukan kerajaan (NGO) dan wakil mahasiswa daripada institusi pengajian tinggi awam dan swasta itu bertujuan mencari mekanisme terbaik bagi menyelesaikan masalah yang sering dihadapi peminjam PTPTN.

Naib Ketua Pemuda Umno Datuk Razali Ibrahim berkata rundingan selama dua hari itu akan mengambil kira semua pandangan dan idea daripada peminjam yang diterima pergerakan itu melalui media sosial sejak seminggu lepas.

"Rundingan ini merupakan platform terbaik untuk mengkaji masalah tersebut dan pada akhirnya kita mengharapkan satu resolusi terbaik untuk diserahkan kepada Perdana Menteri Datuk Seri Najib Tun Razak," katanya kepada pemberita selepas merasmikan rundingan berkenaan di sini.

Katanya masalah pembayaran balik pinjaman itu hanya melibatkan 17 peratus daripada lebih 1.9 juta peminjam sehingga tahun lepas.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=658321>